

1. Mizoram leh Assam ramri chungchanga State pahnih hruaitute inbiakna chu wawiin khan Aizawl State Guest house ah neih a ni.
2. Chief Minister Pu Lalduhoma kaihhruiin Council of Minister meeting wawiin khan neih a ni.
3. Sawrkar laipui chuan Indo-Bangladesh ramri vil tu tur committee a din.
4. Nobel Prize dawng tawh Mohammad Yunus chu Bangladesh interim government hruaitu atan laklulh a ni.

<><><>

**BORDER TALKS**

Mizoram leh Assam ramri chungchanga State pahnih hruaitute inbiakna chu wawiin khan Aizawl State Guest house ah neih a ni.

Ram pahnih aiawhte hi wawiin tlai dar 4 khan an inbia a, tun dinhmunah hian palaite inbiakna hi ala zo lo a, state pahnih te pawm tlan Joint Statement an siam dawn a ni.

Ramri chungchang inbiakna nei tur hian Assam sawrkar aiawhte chuan wawiin khan Aizawl lo thlengin, Assam Minister, Border Protection & Development changtu, Atul Bora chuan a rawn ho a, Mizoram lam hi Home Minister Pu K. Sapdanga' n kaihhruiin Mizoram sawrkar thuneitu sang ten an tel pui a, an inkawm zawh hian thuthar lakhawmtute an kawm chhonzawm nghal dawn a ni.

Wawiina Aizawla State pahnih hruaitute inbiakna hi kum 2022 November ni 17-a Guwahati a an inbiak hnua an inbiak lehna hmasa ber tur niin, ZPM sorkar hnuaia ramri chungchang sawihona hmasa ber a ni dawn bawk a ni.

Puan tawh thin angin, kum 2021 July thla khan State pahnih te hi ram inchuh avanga intibuaiin, silai hial hmehpuah a nih phah a, state pahnih te inrem theih nan wawi engemawzat inbiak tawh niin, ramri a ralmuan leh theihnan state pahnih ten ramri ah kutthlak tawh lo turin inremna an nei mek a ni.

<><><>

**LS MP**

Lok Sabha MP Pu Richard Vanlalthmangaihan wawiin Parliament sessionah Mizorama vawk pul hri avanga harsatna tawk te chungchang a sawi a,

Lok Sabha Budget Session neih mekah Mizoram MP chuan a wawi khatnan thusawiin hun rei tawh tak atanga vawk pul hri –African Swine Fever leng avanga Mizoram mipui leh a bik takin vawk vulhtuten harsatna nasa tak an tawh thu a sawi a. Tun thleng hian vawk 8250 an thih tawh thu a sawi.

Pu Richard-a chuan vawk hri leng avanga vawk vulhtute chhawmdawlina tur Central atangin engmah puihna an la hmuh loh thu sawiin, Mizoram Sorkarin Central Sorkara vawk vulhtute hnena zangnadawmna tur a ruahman Project a siam cheng vbc 26 leh nuai 725 tihfel sak thuai turin Union Minister, Animal Husbandry chu a ngen nghal bawk a ni.

<><><>

**CABINET MEETING**

Chief Minister Pu Lalduhoma kaihhruiin Council of Minister meeting wawiin khan neih a ni a.

An thu pawm zingah The Mizoram State Higher Education Council Rules, 2024, Mizoram Juvenile Justice (Care & Protection of Children) (Amendment) Rules, 2024 duan chhin, Mizoram chhim lama Greenfield Airport siam, Mizoram Public Records Rules, 2014 leh Mizoram Public Records Act, 2011 siamthat te a tel a, hei bakah hian Mizoram Goods and Services Tax (Second Amendment) Bill, 2024 leh Mizoram Lokayukta (Amendment) Bill, 2024 hman te a tel a ni.

<><><>

## **NATIONAL DEWORMING DAY**

Rulhut Do beihpui National Deworming Day (NDD) August round chu Aizawl a Helen Lowry Higher Secondary Schoolah vawiin khan Health Secretary Pi Sangchhin Chinzah chuan a hawng. He hun hi National Health Mission Director Dr. Eric Zomawian a kaihruai a ni.

National Deworming Day hi kum 2016 atangin kumtin hman thin niin kum khatah vawi hnih (2) hman thin a ni a. National Deworming Day ah hian Naupang leh Tleirawl kum 1 – 19 inkar te hnenah a thlawnin Rulhut Hlo (Albendazole) eitir thin an ni a. Rulhut hlo hi School leh Anganwadi Centre ah te eitir thin an ni. Rulhut pai avanga thisen tlakchhamna leh taksa a harsatna hrang hrang awm thei te venna atan National Deworming Day hi hman thin a ni.

National Deworming Day hawnna hun hi Aizawl mai bakah District hrang hrangah a ruala hman a ni bawk a, Champhaiah chuan Champhai Bawrh sap Pu VL Remliana'n BC Lalthlamuana English Academy, Kahrawt Vengah a hawng a.

Lungleiah Government Mount Hermon Middle School, Ramthar Vengah, rulhut hlo pek beihpui thlak thawh hnihna hi Lunglei District Additional Deputy Commissioner Pu James Mialung chuan a hawng a, sikul naupang thlan chhuahte hnenah rulhut hlo Tab. Albendazole a eitir a ni.

Champhai District chhunga sawrkar sikul 332, private school 106 leh Anganwadi 288-ah te rulhut hlo do beihpui hi kalpui a ni dawn a, hei bakah hian sikul kal tawh lo te tan pawh ruahmanna siam a ni. Vawiina rulhut hlo ei hman lo te tan August ni 16 khian thualnawna neih leh tur a ni a, naupang 52,609 te hnenah rulhut hlo hi pek tum a ni.

<><><>

## **INDIGENOUS PEOPLES DAY**

United Nations (UN)-in khawvel pum huapa tualto hnamte puala ni serh, International Day of the World's Indigenous Peoples chu ZO Re-unification Organisation (ZORO), Divisional Headquarters, Lunglei buatsaihin Saikuti Hall, Lungleiah hman a ni a, Assembly Speaker Pu Lalbiakzama leh Lunglei High Powered Committee (HPC) Vice Chairman Pu V. Malsawmtluanga ten an hmanpuii.

Pu Lalbiakzama chuan Zo hnaathlak zawng zawngte World Indigenous Peoples' Day chibai bukin, Zofate hnam anga inpumkhatna leh din chhuahta a nih theih nan Zofa unau zawng zawngte duhsakna a hlan a. Zofate awmna azirin hming hran hran - Mizo, Zo-Kuki, Chin, leh a dang hming pu mah se, thlahtu khat, thisen inzawm, hnam khat an ni a, Zofate hi khawvelah maktaduai 2 leh nuai 8 vel an awm anga ngaih theih a ni a ti. Hnam anga ram bial nei lo tam tak an awm lain Zofate chuan mahni hnam hming chawi ngeia Mizoram an nei chu an vannei hle a ni, a ti a. Zofate luah ram ang zela mihring cheng zat data update neih chakawm a tih thu leh ZORO te'n hma la thei se a duh thu sawiin, chu chu internet khawvela hmuh leh hai chhuahtung zung zung theiha siam anih chuan hnam anga zahawmna a ni dawn a ni, a ti.

Pu Lalmuanpuia Punte, MLA, Adviser to Chief Minister, ZORO General Headquarters Vice President ni bawk chuan tualto hnamte dikna leh chanvo humhalh tura UN hma lakna bawhzuia ZORO hma lak dan leh hmahlir tar langin, ram tiam thleng turin Zo hnaathlak zawng zawngte hrui khat vuana awm a tul tih a sawi a. ZORO thil tum Zo hnaathlak then darha awmte ram khata inzawm khawm a, mahnia ro inrel a hlawhtlin theih nan Zo hnaathlak hnam hrang hrangte'n inpumkhat leh insuih khawm duhna rilru an put tlan a, an hmin kim a ngai a ni, a ti.

Zo Re-unification Organisation (ZORO) hi May ni 21, 2004-ah Zofa zawng zawng ai awhin UNO-ah Affiliated NGO member-ah khung a ni a, heta chinah hian ZORO chuan chawl lovin Zofate kan insuih khawm a, hnam anga din chhuaht theih nan a bei a ni. Vawiina kalkhawmte hian resolution siamin Zofate insuih khawm lehna tura ZORO-in a beihna chu India, Myanmar leh Bangladesh-a sawrkar luah Zofa zawng zawngte'n thlawp tlat a, insuih khawmna tura thawk tlang turin an ngen tih a tel a ni.



## AMC

Aizawl Municipal Corporation Ward VI Corporator atana By Election neih tura candidate pathum - Chawngmingthanga (BJP), H. Lalremtuanga (Zoram People's Movement) leh Lalrinfeli (Independent) te chu Municipal Returning Officer Pu Mark Lalthanliana leh Assistant Returning Officer Pi Malsawmhriatzuali hovin Addl DC pisa ah an thu khawm a. An nomination paper te enfiah sak niin, a felfai vek tia pawmsak an ni.

Returning Officer ho hian Candidate te leh an election agent te chuan inthlanna atana hriattur tul pawimawh leh inkaihruaina te inhrilhhriat a ni a. Election Campaign neih chhunga an campaign senso awm thei hrang hrang leh a man zat tur bituk in neih nghal a ni bawk.



## INDO-BANGLA BORDER COMMITTEE

Sawrkar laipui chuan Indo-Bangladesh ramri vil tu tur committee a din. He committee hian Bangladesh lam thuneitute nen thawk hoin India mite leh Bangladesh-a hnam leh sakhaw tlem zawkte himna tur an ngaihtuah dawn a. He Committee hi Border Security Force (BSF) ADG chuan a kaihhruai ang a. Ani bakah hian BSF IG Frontier Headquarters South Bengal, IG BSF Frontier Headquarters Tripura, Land Ports Authority of India atangin Planning and Development Member leh LPAI Secretary te ruat an ni.



## HAR GHAR TIRANGA

Rampumah intina hnam puanzar zar tura beihpui thlakna Har Ghar Tiranga campaign chu vawiin atanga tanin tun thla ni 15 thleng hman a ni dawn. Uoin Culture and Tourism Minister Gajendra Singh Shekhawat chuan nimin khan chanchinbumite kawmin mipuite chu hnam puanzar an zar te thla lak puia Har Ghar Tiranga website ah rawn dah turin a sawm a. Kum 2022 atang khan Azadi Ka Amrit Mahotsav hnuaiah Har Ghar Tiranga hi bul tan a ni tih sawiin nikumah khan mi vaibelchhe 10 chuangin hnam puanzar thla an lakpui hi internet ah an pho lang a ti a. Cultural program pawh sang hnih chuang rampumah buaitsaih a ni a ti a. Tiranga Bike Rally chu tun thla ni 13 ah hian MP leh Union Minister te nen huaihawt a ni ang a ti bawk.

## MOHAMMED YUNUS

Nobel Prize dawng tawh Mohammad Yunus chu Bangladesh interim government hruaitu atan vawiin khan lakluh a ni. President Mohammed Shahabuddin chuan Dhaka-a Bangabhaban-ah Mohammed Yunus hi rinawmna thu tiam tirin a lalut a. He hunah hian ram hrang hrang atangin hruaitu pawimawhte an tel a ni.

Mohammed Yunus hi kum 1940 June ni 28 ah a piang a. Sumdawn, banker leh economist a ni a. Kum 2006 khan Grameen Bank kaltlanga a hnathawh that avangin Nobel Peace Prize hlan a ni a. Interim government-a hruaitu atana ruat lailawk a nih vang hian Bangladesh politics buai mekah hmasawmna lian tak a thlen beisei a ni.



## OLYMPIC

Paris Olympic neih mekah nizan khan mipa javelin throw-ah Neeraj Chopra chuan silver medal a la. Javelin throw finalah hian Pakistan mi Arshad Nadeem chuan meter 92.97 a thui khawha Olympic record siamin gold medal a la a. Neeraj Chopra hian meter 89.45 a thui khawhin silver medal a la ve thung a. Grenadian Anderson Peters chuan bronze a la a ni.

Hetihlai hian India mipa hockey team te chuan nimin khan bronze medal match ah Spain hnehin bronze an la bawk a ni.

President Draupadi Murmu, Vice President Jagdeep Dhankar leh Prime Minster Narendra Modi ate chuan India tana medal hlawh chhuaktute an lawmpui thu an sawi a ni.

